

# Eleccziuns da renovaziun da la Dretgira regiunala Surselva per la perioda d'uffizi 2025-2028

## Invit d'inoltrar propostas electoralas

Sco data per las eleccziuns da las dretgiras regiunalas per la perioda d'uffizi dal *1. da schaner 2025 fin ils 31 da december 2028* ha la Regenza fixà ils 9 da zercladur 2024. In eventual segund scrutini ha lieu ils 11 d'avust 2024.

Las propostas electoralas per las funcziuns giudizialas menziunadas qua sutvart ston vegnir inoltradas fin il pli tard ils **8 d'avrigl 2024, a las 12.00**, a la **Dretgira regiunala Surselva** (Via Centrala 4, Caum postal 20, 7130 Glion). Decisiva è l'entrada efectiva e betg la consegna a la Posta (art. 19e da la Lescha davart ils dretgs politics en il chantun Grischun [LDPC; DG 150.100]).

- Presidenta u president
- Vicepresidenta u vicepresidente en uffizi principal (pensum 70%)
- Otg derschadras e derschaders en uffizi accessoric

Elegibels èn burgaisas e burgais svizzers che han cumplenì 18 onns, che n'èn betg sut curatella cumplessiva pervia d'ina inabilitad permanenta da giuditgar u che na vegnan betg represchentads d'ina persuna incumbensada da prevenziun, e che abitan en il chantun.

Pretensiuns envers las propostas electoralas (cf. art. 19c fin 19e LDPC):

- La proposta electorala dastga cuntegnair maximalmain tants numns da personas elegiblas sco quai ch'i stattan a disposiziun sezs, e nagins numns dapli ch'ina giada.
- La proposta electorala sto inditgar il num da famiglia, il prenum, la data da naschienscha e l'adressa da domicil da la persuna proponida.
- Mintga persuna proponida sto confermar - cun suttascriver a maun la proposta electorala - ch'ella acceptia la candidatura.
- Mintga proposta electorala sto vegnir suttascritta a maun, e quai da diesch personas cun dretg da votar che abitan en il circol electoral. Ina persuna cun dretg da votar na dastga betg suttascriver dapli ch'ina proposta electorala. Las sutsegnadras ed ils sutsegnaders ston designar ina persuna sco represchentanta da la proposta electorala ed ina persuna sco sia substituziun. Sch'i vegn desistì da quai, vala l'emprima sutsegnadra u l'emprim sutsegnader sco represchentanta u represchentant e la segunda sutsegnadra u il segund sutsegnader sco substituziun.

Retratgas da propostas electoralas ston arrivar fin il pli tard ils 12 d'avrigl 2024, a las 12.00, tar la dretgira regiunala (cumissiun administrativa).

Formulars per inoltrar las glistas electoralas pon vegnir retratgs tar la Dretgira regiunala Surselva, Via Centrala 4, 7130 Glion (tel. 081 257 59 84).

En cas d'in segund scrutini ston las propostas electoralas vegnir inoltradas fin il pli tard **dumengia, ils 16 da zercladur 2024, a las 12.00**, a la Dretgira regiunala Surselva (Via Centrala 4, Caum postal 20, 7130 Glion). Decisiva è l'entrada efectiva e betg la consegna a la Posta (art. 19i al. 1 LDPC).

Glion, 6 da favrer 2024

Cumissiun administrativa  
da la Dretgira regiunala Surselva